

庶徵典

庶徵典第一百三十九卷

人事異部紀事四

周書宣帝本紀帝之在東宮也高祖慮其不堪承嗣遇之甚嚴朝見進止與諸臣無異雖隆寒盛暑亦不得休息性既嗜酒高祖遂禁醪醴不許至東宮帝每有過輒加捶扑嘗謂之曰古來太子被廢者幾人餘兒豈不堪立耶於是遣東宮官屬錄帝言語動作每月奏聞帝憚高祖威嚴矯情修飾以是過惡遂不外聞嗣位之初方逞其欲大行在殯曾無戚容卽闔視先帝宮人逼爲淫亂纔及踰年便恣聲樂采擇天下子女以充後宮好自矜夸飾非拒諫禪位之後彌復驕奢耽酗於後宮或旬日不出公卿近臣請事者皆附奄官奏之所居宮殿帷帳皆飾以金玉珠寶光華炫燿極麗窮奢及營洛陽宮雖未成畢其規模壯麗踰於漢魏遠矣惟自尊崇無所顧憚國典朝儀率情變改後宮位號莫能詳錄每對臣下自稱爲天以五色土塗所御天德殿各隨方色又於後宮與皇后等列坐用宗廟禮器罇彝珪瓚之屬以飲食焉又令羣臣朝天臺者皆致齋三日清身一日車旗章服倍於前王之數旣自比上帝不欲令人同己嘗自帶綬及冠通天冠加金附蟬顧見侍臣武弁上有金蟬及王

公有綬者並令去之又不得聽人有高大之稱諸姓高者改爲姜九族稱高祖者爲長祖曾祖爲次長祖官名凡稱上及大者改爲長有天者亦改之又令天下車皆以渾成木爲輪禁天下婦人皆不得施粉黛之飾唯宮人得乘有輻車加粉黛焉西陽公溫杞國公亮之子卽帝之從祖兄子也其妻尉遲氏有容色因入朝帝遂飲之以酒逼而淫之亮聞之懼誅乃反纔誅溫卽追尉遲氏入宮初爲妃尋立爲皇后每召侍臣諭議唯欲興造變革未嘗言及治政其後遊戲無恆出入不飾羽儀仗衛晨出夜還或幸天興宮或遊道會苑陪侍之官皆不堪命散樂雜戲魚龍爛漫之伎常在目前好令京城少年爲婦人服飾入殿歌舞與後宮觀之以爲喜樂擯斥近臣多所猜忌又悉於財略無賜與恐羣臣規諫不得行己之志常遣左右密伺察之動止所爲莫不抄錄小有乖違輒加其罪自公卿已下皆被楚撻其間誅戮黜免者不可勝言每笞捶人皆以百二十爲度名曰天杖宮人內職亦如之后妃嬪御雖被寵嬖亦多被杖背於是內外恐懼人不自安皆求苟免莫有固志重足累息以逮於終

大象元年十二月甲子御正武殿集百官及宮人內外命婦大列妓樂又縱胡人乞寒用水澆沃爲戲樂乙丑行幸洛陽帝親御驛馬日行三百里四皇后及文武侍衛數百人並乘驛以從仍

令四后方駕齊驅或有先後便加譴責人馬頓仆相屬

隋書五行志開皇中房陵王勇之在東宮及宜陽公王世積家婦人所服領巾制同襍幡軍幟婦人爲陰臣象也而服兵幟臣有兵禍之應矣勇竟以遇害世積坐伏誅

煬帝本紀初上自以藩王次不當立每矯情飾行以釣虛名陰有奪宗之計時高祖雅信文獻皇后而性忌妾媵皇太子勇內多嬖幸以此失愛帝後庭有子皆不育之示無私寵取媚於后大臣用事者傾心與交中使至第無貴賤皆曲承顏色申以厚禮婢僕往來者無不稱其仁孝又常私入宮掖密謀於獻后楊素等因機構扇遂成廢立自高祖大漸暨諒闇之中烝淫無度山陵始就卽事巡遊以天下承平日久士馬全盛慨然慕秦皇漢武之事乃盛治宮室窮極侈靡召募行人分使絕域諸蕃至者厚加禮賜有不恭命以兵擊之盛興屯田於玉門柳城之外課天下富戶益市武馬匹直十餘萬富強坐是凍餒者十家而九帝性多詭譎所幸之處不欲人知每之一所輒數道置頓四海珍羞殊味水陸必備焉求市者無遠不至郡縣官人競爲獻食豐厚者進擢疎儉者獲罪奸吏侵漁內外虛竭頭會箕斂人不聊生於時軍國多務日不暇給帝方驕怠惡聞政事冤屈不治奏請罕決又

猜忌臣下無所專任朝臣有不合意者必搆其罪而族滅之故高潁賀若弼先皇心膂參謀帷幄張衡李金才藩邸惟舊績著經綸或惡其直道或忿其正議求其無形之罪加以刎頸之誅其餘事君盡禮蹇蹇匪躬無辜無罪橫受夷戮者不可勝紀政刑弛紊賄貨公行莫敢正言道路以目六軍不息百役繁興行者不歸居者失業人饑相食邑落爲墟上不之恤也東西遊幸靡有定居每以供費不給逆收數年之賦所至唯與後宮流連沈湎惟日不足招迎嫖嫗朝夕共肆醜言又引少年令與宮人穢亂不軌不遜以爲娛樂區宇之內盜賊蜂起劫掠從官屠陷城邑近臣互相掩蔽隱賊數不以實對或有言賊多者輒大被詰責各求苟免上下相蒙每出師徒敗亡相繼戰士盡力必不加賞百姓無辜咸受屠戮黎庶憤怨天下土崩至於就擒而尤未之寤也

五行志煬帝自負才學每驕天下之士嘗謂侍臣曰天下當謂朕承藉餘緒而有四海耶設令朕與士大夫高選亦當爲天子矣謂當世之賢皆所不逮書云謂人莫己若者亡帝自矜己以輕天下能不亡乎帝又言習吳音其後竟於江都此亦魯襄公終於楚宮之類也

冊府元龜越王貞爲豫州刺史則天垂拱中貞子博州刺史琅邪王冲據博州舉兵貞應之嘗遊於

城西水門橋臨水自鑑不見其首心甚惡之未幾禍及

唐書常山愍王承乾傳承乾立爲皇太子臨朝言諄諄必忠孝退乃與羣不逞狎慢左右或進諫危坐斂容痛自咎飾非辯給諫者拜答不暇時魏王泰有美名帝愛重而承乾病足不良行且懼廢與泰交惡東宮有俳兒善恣首承乾嬖愛帝聞震怒收兒殺之坐死者數人承乾意爲泰告望甚內念兒不已築室圖其像贈官樹碑爲起冢苑中朝夕祭承乾至其處徘徊涕數行下愈怨懟稱疾不朝累數月使戶奴數十百人習音聲學胡人椎髻剪綵爲舞衣尋撞劍鼓鞀聲通晝夜不絕造大銅爐六熟鼎招亡奴盜取人牛馬親視烹燂召所幸厮養供食之又好突厥言及所服選貌類胡者被以羊裘辮髮五人連一落張氈舍造五狼頭纛分戟爲陣繫幡旗設穹廬自居使諸部斂羊以烹抽佩刀割肉相啗承乾身作可汗死使衆號哭罄面奔馬環臨之忽復起曰使我有天下將數萬騎到金城然後解髮委身思摩當一設顧不快耶左右私相語以爲妖又襍氈爲鎧列丹幟勒部陣與漢王元昌分統大呼擊刺爲樂不用命者拔樹扶之或至死輕者輒腐之嘗曰我作天子當肆吾欲有諫者我殺之殺五百人豈不定召刺客紇干承基等謀殺魏王泰不克遂與侯君集謀以兵入西宮

承基上變廢爲庶人徙黔州死

越王貞傳中宗廢居房陵貞及子琅琊王冲計議反正兵敗仰藥死始貞臨水自鑒不見其首惡之未幾及禍

五行志元宗好鬪雞貴臣外戚皆尙之貧者或弄木雞識者以爲雞酉屬帝生之歲也鬪者兵象近雞禍也

開元天寶遺事宮中嬪妃輩施素粉於兩頰相號爲淚粧識者以爲不祥後有祿山之亂明皇與貴妃每至酒酣使妃子統宮妓百餘人帝統小中貴百餘人排兩陣於掖庭中目爲風流陣以霞帔錦被張之爲旗幟攻擊相鬪敗者罰之巨觥以戲笑時議以爲不祥之兆後果有祿山兵亂天意人事不偶然也

冊府元龜劉闢爲劍南西川節度使韋臯府行軍司馬闢嘗病見問疾者皆以手據地倒行入關口闢因饑裂食之唯盧文若至則如平常故尤與文若相睦卒以同惡族其家

雲溪友議邕州蔡大夫京者故令狐相公鎮楚滑臺之日因道場見於僧中令京挈瓶鉢彭陽公曰

此童眉目疎秀進退不懾惜其卑幼可以勸學因師從之乃得倍相國子弟

青州尚書緒丞相綯綸也

後以進士

舉上第乃彭陽令狐公之舉也尋又學究登科而作尉畿服既爲御史覆獄淮南李相公紳憂悸而

已頗得繡衣之稱

吳汝南詣闕申冤蔡君先謗之曰是主上憂國之時乃臣下徇私之日

謫居澧州爲厲員外元所辱稍遷撫州刺史

常稱字內無人對僧徒則非大品之談過道流則言五千之義接儒士則比端木之賢於仲尼次論

周易則評先聖之謬來者縱得相許有始而無卒焉

謂丁遐秀才等

郡有汝水爲放生池不與漁畧之事忽

一人乘小舟釣於此蔡君隨遣吏捕之釣者乃爲詩曰拋却長竿捲却絲手攜蓑笠獻新詩臨川太

守清如鏡不是漁人下釣時京覽詩乃召之已去竟不言其姓字或有識者曰野人張頂也

頂字不惑本姓

王隱不言

蔡牧益自驕矜作詩以責商山四老曰秦末家家思逐鹿商山四皓獨忘機如何鬢髮霜相似

更出深山定是非及假節邕郊道經湘口零陵鄭太守史與京同年遠以酒樂相迓座有瓊枝者鄭

君之所愛而席之最殊也蔡強奪之而行鄭莫之禁邕郊所爲多類此爲德義者見鄙終不悛也行

泊中興頌所

地名在涪溪

僊俛不前題篇久之似有悵悵之意纔到邕南制禦失律伏法湘川權厝於此

二子延近號訴蒼天未終喪而俱逝論者以妄責四皓而欲買山於涪溪之間不徒言哉詩曰停櫓

積水中舉目孤煙外借問潯溪人誰家有山賣

唐書王守澄傳憲宗喜方士說詔天下求其人宰相皇甫鏘左金吾將軍李道古等白見楊仁晝浮屠大通仁晝更姓名曰柳泌大通自言壽百五十歲有不死藥並待詔翰林號人田元佐言有祕方能化瓦礫爲黃金詔除號令與董景珍李元戢皆介泌大通薦於天子天子惑其說泌以金石進帝餌之躁甚數暴怒恚責左右踵得罪禁中累息帝自是不豫十五年罷元會羣臣危恐會義成劉悟來朝賜對麟德殿悟出曰上體平矣內外乃安是夜守澄與內常侍陳弘志弑帝於中和殿緣所餌以暴崩告天下

劉克明傳克明亦亾所來得幸敬宗敬宗善擊毬於是陶元皓靳遂良趙士則李公定石定寬以毬工得見便殿內籍宣徽院或教坊然皆出神策隸卒或里閭惡少年帝與狎息殿中爲戲樂四方聞之爭以趨勇進於帝嘗閹角觝三殿有碎首斷臂流血庭中帝歡甚厚賜之夜分罷所親近旣皆凶不逞又小過必責辱自是怨望帝夜艾自捕狐狸爲樂謂之打夜狐中人許遂振李少端魚志弘侍從不及皆削秩帝獵夜還與克明田務澄許文端石定寬蘇佐明王嘉憲閻惟直等二十有八人羣

飲既酣帝更衣燭忽滅克明與佐明定寬弑帝更衣室矯詔召翰林學士路隋作詔書命絳王領軍
國事

劇談錄咸通中有中牟尉李潯寓居圃田別墅稟性剛戾不以鬼神爲意每見人銜杯酌酒無不怒
而止之一旦暴得風眩方臥簷廡之下忽有田父立於榻前云鄰伍間欲來省疾見數人形貌貶劣
服飾或青或紫後有矮僕提酒兩壺相與歷堦而上左右妻孥悉無所覩謂潯曰爾當日負氣忽於
我曹至於醪醴之間必爲他人愛惜今有醇酎數斗衆欲遣君一醉俄以巨盆滿酌逼飲兩壺俱盡
牀第衾裯皆是餘瀝將出謂潯曰何似當時惜酒自茲百骸昏悴如病宿醒寢療憊然數月方愈馮
給事爲鄭州刺史親召李生而說之

唐書田令孜傳僖宗喜鬪鵝走馬數幸六王宅興慶池與諸王鬪鵝一鵝至五十萬錢與內園小兒
尤昵狎倚寵暴橫始帝爲王時與令孜同臥起至是以其知書能處事又帝資狂昏故政事一委之
呼爲父而荒酣無檢發左藏齊天諸庫金幣賜伎子歌兒者日鉅萬國用耗盡令孜語內園小兒尹
希復王士成等勸帝籍京師兩市蕃旅華商寶貨舉送內庫使者監闕櫃坊茶閣有來訴者皆杖死

京兆府令致知帝不足憚則販鬻官爵除拜不待旨假賜緋紫不以聞百度崩弛內外垢玩既所在盜起上下相掩匿帝不及知是時賢人無在者惟佞鄙沓貪相與備員偷安噤默而已

北夢瑣言蜀朝東川節度許存太師有功勳臣也其子承傑卽故黔使君實之子隨母嫁許然其驕貴僭越少有倫比作都頭軍籍只一百二十有七人是音聲伎術卽出同節使行李凡從行之物一切奢大騎碧暖座垂魚紛錯每修書題印章微有浸漬卽必改換書吏苦之流輩以爲話端皆推茂刺顧叟爲首許公他日有會乃謂顧曰閣下何太談謗顧乃分疏因指同席數人爲證顧爲以對逡巡乃曰三哥不用草草碧暖座爲衆所知至於魚袋上鑄蓬萊山非我唱揚席上愈笑方知魚袋更僭也刺茂州入蕃落爲蕃酋害之

五代史張憲傳憲爲東都副留守憲精於吏事甚有能政莊宗幸東都定州王都來朝莊宗命憲治鞠場與都擊鞠初莊宗建號於東都以鞠場爲卽位壇於是憲言卽位壇王者所以興也漢鄯南魏繁陽壇至今皆在不可毀乃別治宮西爲鞠場場未成莊宗怒命兩虞候亟毀壇以爲場憲退而歎曰此不祥之兆也

冊府元龜王殷爲鄴都留守以太祖郊禮入覲令爲內外巡警有震主之勢人頗憂之太祖力疾坐滋福殿降制流竄入都城乃命殺之衆情乃安殷之入覲都人餞之離亭上馬失鐙翻墮於地人訝其不祥太祖尋令澶帥鄭仁誨之鄴殷次子爲衙內指揮使不出候謁誅之遷其家屬於登州宋史張美傳美爲右領軍衛大將軍權判三司世宗征淮南留美爲大內部署一日方假寐忽覺心動遽驚起行視宮城中少頃內醢署火起既有備卽撲滅之俄真授三司使

徐休復傳休復知廣州雍熙二年就遷比部郎中充樞密直學士賜金紫依舊知州事休復與轉運使王延範不協乃奏延範私養術士厚待過客撫部下吏有恩發書與故人韋務昇作隱語傾朝廷事反狀已具詔遣內侍閻承翰與休復同按劾之遂抵於法端拱初加左諫議大夫召爲戶部使淳化元年罷使遷給事中連知青潞二州休復先上言以父母墓葬青社願得領州事因營丘壘至青州踰年但聚財殖貨終不言葬事至潞州數月瘍生於腦旣而疾甚若見王延範休復但號呼稱死罪後數日卒

蘇曉傳曉字表東京兆武功人長興初辟鄧州從事漢祖鎮太原表爲觀察支使周廣順初由華州

支使入爲大理正以獻獄有功遷少卿顯德中歷屯田郎中宋初詔與竇儀奚嶼張希讓等同詳定刑統爲三十卷及編敕四卷建隆四年權大理少卿事遷度支郎中乾德三年出爲淮南轉運使建議權斬黃舒廬壽五州茶置十四場規其利歲入百餘萬緡開寶三年遷司勳郎中改西川轉運使仍掌京城市征先是朝廷遣供備庫事李守信市木秦隴間守信盜官錢鉅萬旣受代爲部下所發守信至中牟自剄於傳舍太祖命曉案之逮捕甚衆右拾遺通判秦州馬適妻李卽守信息女守信嘗用木爲筏以遺適曉得守信所送書以進太祖將捨之曉上章固請寘於法仍籍其家餘所連及者多至破產盡得所隱沒官錢擢拜曉右諫議大夫判太理寺賜金紫遷左諫議大夫七年監在京商稅九年六月卒年七十三曉深文少恩當時號爲酷吏及卒無子有一女甚鍾愛亦先曉卒人以爲深刻所致

李符傳符歷三司副使太平興國七年開封尹秦王廷美出守西京以符知開封府廷美事發太宗令歸第省過趙普令符上言廷美在西洛非便恐有他變宜遷遠郡以絕人望遂有房陵之貶普恐泄言坐符用刑不當貶寧國軍行軍司馬盧多遜貶崖州也符白普曰珠崖雖遠在海中而水土頗

善春州稍近瘴氣甚毒至者必死願徙多遜處之普不答先是太宗尹京符因宋琪薦彌德超事藩邸符貶德超爲樞密副使屢稱其冤會德超以事貶帝惡其朋黨徙符嶺表普移符知春州至郡歲餘卒年五十九符無文學有吏幹好希人主意以求進用終以此敗

田況傳始契丹寇澶州略得數百人以屬其父延昭延昭哀之悉縱去因自脫歸中國延昭生八男子多知名況長子也保州之役況阮殺降卒數百人朝廷壯其決後大用之然卒無子以兄子爲後王彥超傳彥超封邠國公表求致仕初彥超將致政每誡諸子曰吾累爲統帥殺人多矣身死得免爲幸必無陰德以及後汝曹勉爲善事以自庇及卒諸子果無達者宣化門內有大第園林甚盛不十餘年其家已鬻之矣

盧多遜傳多遜父億性儉素自奉甚薄及多遜貴顯賜賚優厚服用漸侈愀然不樂謂親友曰家世儒素一旦富貴暴至吾未知稅駕之所後多遜果敗人服其識

賈黃中傳淳熙五年知襄州上言母老乞留京改知澶州辭日上戒之曰夫小心翼翼君臣皆當然若太過則失大臣之體黃中頓首謝上因謂侍臣曰朕嘗念其母有賢德七十餘年未覺老每與之

語甚明敏黃中終日憂畏必先其母老矣至道二年以疾卒年五十六其母尙無恙卒如上言

三朝聖政錄真宗皇帝因元夕御樓觀燈見都人熙熙舉酒顧宰執曰祖宗創業艱難朕今獲覩太平與卿等同慶宰執稱賀皆飲醕獨李文靖沆終觴不懌明日王文正旦問其所以且曰上昨日宣勸懽甚公不肯少有將順何也文靖曰太平二字嘗恐諛佞之臣以之藉口干進今人主自用此誇耀臣下則忠鯁何由以進旣謂太平則求祥瑞而封禪之說進若必爲之則耗帑藏而輕民力萬一有患生於意外則何以支吾沆老矣茲事必不親見叅政他日當之矣其後四方奏祥瑞無虛日東封西祀講求典禮紛然不可遏王公追思其言歎曰李文靖真聖人也求文靖畫像置於書室中而日拜之予屢見前輩說此詢於兩家子孫其言皆同

宋史周恭肅王元儼傳元儼子允良封華原郡王改襄陽由同中書門下平章事兼侍中至太保中書令好酣寢以日爲夜由是一宮之人皆晝睡夕興薨贈定王有司以其反易晦明諡曰榮易

溫公續詩話梅聖俞之卒也余與宋子才選韓欽聖宗彥沈文通邁俱爲三司僚屬共痛惜之子才曰比見聖俞面光澤特甚意爲充盛不知乃爲不祥也時欽聖面亦光澤文通指之曰次至欽聖矣

衆皆尤其暴謔不數月欽聖抱疾而卒俞謂文通曰君雖不爲呪詛亦戲殺耳此雖無預時事然以其與聖俞同時事又相類故附之

宋史王韶傳韶德安人交親多楚人依韶求仕乃分屬諸將或殺降羌老弱予以首爲功級韶晚節言動不常頗若狂病狀旣病疽洞見五臟蓋亦多殺之徵云

可談王安禮尙氣不下人紹聖初起師太原過闕許見時樞府虛位安禮銳意士亦屬望將至京師答諸公遠迎書自兩制而下皆楊角一區封語傲禮簡或於上前言其素行旣對促赴新任怏怏數月而死

程史宣和之季京師士庶競以鵝黃爲腹圍謂之腰上黃婦人便服不施衿紐束身短製謂之不製衿始自宮掖未幾而通國皆服之明年徽宗內禪稱上皇竟有青城之邀而金亂卒不能制斯亦服妖之比歟

清波雜誌蔡攸副童貫出師北伐有少保節度使與宣撫副使二認旗從于後次日執旗兵逃去二旗亦失之識者知爲不祥旣行徽宗與其父京曰攸辭日奏功成後要問赦寬念四五都知其英氣

如此京但謝以小子無狀二人乃上寵嬪念四者閭婕妤也

金史張仲軻傳仲軻幼名牛兒市井無賴說傳奇小說雜以俳優詼諧語爲業海陵引之左右以資戲笑海陵封岐國王以爲書表及卽位爲祕書郎海陵嘗對仲軻與妃嬪褻瀆仲軻但稱死罪不敢仰視又嘗令仲軻保形以觀之侍臣往往保褻雖徒單貞亦不免此兵部侍郎完顏普連大興少尹李淳皆以賊敗海陵置之要近伶人千慶兒宮五品大氏家奴王之彰爲祕書郎之彰置珠偏僻海陵親視之不以爲褻唐括辯家奴和尚烏帶家奴葛溫葛魯皆置宿衛有僥倖至一品者左右或無官職人或以名呼之卽受以顯階海陵語其人曰爾復能名之乎嘗置黃金裯褥間喜之者令自取之其濫賜如此

元史哈麻傳哈麻嘗陰進西天僧以運氣術媚帝帝習爲之號演撲兒法演撲兒華言大喜樂也哈麻之妹婿集賢學士秃魯帖木兒故有寵於帝與老的沙八郎答刺馬吉的波迪哇兒禡等十人俱號倚納秃魯帖木兒性奸狡帝愛之言聽計從亦薦西蕃僧伽璘真於帝其僧善祕密法謂帝曰陛下雖尊居萬乘富有四海不過保有見世而已人生能幾何當受此祕密大喜樂禪定帝又習之其